

Carta nachindahá Pablo nuú na cúú cuéntá Jesús ndúu ñundáhyi Galacia

Chíndahá Pablo Ndióxi coo na cúú cuéntá Jesús ndúu ñundáhyi Galacia

1 Yehe cúú Pablo, da cáhyi carta yóho nu ndo. Nacaxi Ndióxi yehe cacuu u in apóstol ta a juú toho ñayivi nacaxi yehe. Ta ni coó nachindahá ñayivi yehe jáchi Jesucristo xihín Ndióxi, tátá yo, mé a najánditacu Jesucristo, mé a cán quea nacaxi a yehe cacuu u in apóstol. ²Yehe xihín tóco ndihi java ga na cúú cuéntá Jesús ndúu xihín i yóho, chíndahá nde carta yóho nu ndóhó, na ndúu ñundáhyi cuéntá Galacia jan. ³Ña cúní nde quea ná caja Ndióxi, tátá yo xihín Jesucristo, xitoho í cuahá ñamani xihín ndo ta ná caja mé á ña ná coo vaha ini ndó. ⁴Xíní ñúhú ndicuhun ini ndó ña nandiquiahva Jesucristo mé á quivi a saha cuachi cája í ta xihín ña yóho najácacu a mí nuú ña núu cája ñayivi ñuyívi. Ta nayaha ña yóho jáchi já cúní Ndióxi, tátá yo. ⁵Cáhnú ndivaha ná cacuu Ndióxi anda ama cáa quívi. Já ná coo.

Coó ga inga tuhun cáhan sahá Jesucristo ña cuu jácacu a mí

⁶Mé a ndaa nacatontó ndivaha i jáchi cama chá nacasáhá ndo cáxoo ndó nu Ndióxi, mé a nacana ndohó cacuu ndó cuéntá mé á sahá ña quíhvi ini Jesucristo ndohó. Ta viti nacasáhá ndo xíní johó ndó inga tuhun ña cáchí ñayivi cuu jácacu a ndohó. ⁷Mé a ndaa coó toho inga tuhun ña cuu jácacu a ñayivi. In túhún va cúú tuhun Ndióxi ta cáhan sahá Jesucristo. Joo ndúu java ñayivi ta cúní na jájana na jiní ndo ta cúní na ndijama na tuhun vaha cáhan sahá Jesucristo, mé a jácacu mí. ⁸Joo tá vaxi in na ta jánaha na inga tuhun ña cáchí na cuu jácacu a ndohó ta co cúú á tuhun vaha ña najánaha nde nu ndó já quea ná cuhun cháhan jata ná ta coó caja toho a ndá ñayivi cúú ná janda mí i á janda in tátó Ndióxi ná quixi indiví. ⁹Sa nacachi i ña yóho xihín ndó jihna ta viti ndicó coo tucu u cahan i ña xihín ndo: tá jánaha in ñayivi inga tuhun ña cáchí na cuu jácacu a ndohó ta co cúú á tuhun najánaha nde nu ndo já quea ná cuhun cháhan jata ná.

¹⁰Co ndúcú u candoo vaha i nuú ñayivi. Ña cúní quea candoo vaha i nu Ndióxi jáchi tá cúní candoo vaha i nuú ñayivi já cúní cachi a ña co cúú ga i da cája chúun cuéntá Jesucristo xihín ndinuhu ini i.

Ndícani Pablo ndaja nanduu da apóstol

¹¹Candehé ndó ñani mí i, na cúu cuéntá Jesús. Mé tuhun nacahan i xihin ndó coó naquixi a jiní ñayivi ñuyívi. ¹²Ta coó nandiquehe e ña nuú ñayivi. Ta ni in túhún toho ñayivi coó najánaha na ña nuú i jáchi Jesucristo quea najánaha ña nuú i. ¹³Cája i cuéntá sa naxini johó ndó sahá ña nacaja i jihna tá nasandico i costumbre na Israel. Jáchi naxojo ndivaha ini i xihin na cúu cuéntá Jesús mé tiempo cán. Ta nacaja xixi ndivaha i xihin ná ta nasacu ini i jándihi i saha ná. ¹⁴Ta mí i nasacuu u da nacayojó chága cája costumbre na Israel nuú ndihi na ñuu i, na nasahnu xihin i. Jáchi nasativi i xihin ndinuhu ini i costumbre tásahnu jícó nde. ¹⁵Joo Ndióxi nacaxi a yehe janda tá cámaní cacu u ñuyívi yóho ta sahá ña cúni a caja ñamani xihin i sahá ña cán quea nacana mé á yehe. Ta tá naxinu coo quívi nasacu ini mé á ¹⁶já najánaha Ndióxi Jesucristo, jahyi a nuú i já ná cuu caxi tuhun i tuhun vaha saha mé á nuú na coó naquixi chichi Israel. Ta mé tiempo cán coó nasahan i cahan i xihin ni in ñayivi sahá ña najánaha Ndióxi nuú i. ¹⁷Ta ni coó nasahan i ñuu Jerusalén cahan i xihin na cúu apóstol nu cuítí a juú ga yehe. Na nacaja i quea ivi laá naquee nasahan i ñundáhyi cuéntá Arabia. Ta tá nandihi nandicó coo i chí ñuu Damasco.

¹⁸Ta tá sa nayaha uní cuia já nasahan i ñuu Jerusalén ndicuni táhan i xihin Pedro ta nasahin i sahun quívi xihin dá. ¹⁹Ta cán naxini ri da cúu Jacobo, ñani Jesucristo joo coó naxini toho i na java ga cúu apóstol cán. ²⁰Sándehe cáxi Ndióxi ña co jándahvi toho i ndohó. Na ndaa quea cáhyi i nu ndó yóho.

²¹Tá nandihi já naquee e cuahan i chí ñundáhyi cuéntá Siria xihin Cilicia. ²²Joo mé tiempo cán na cúu cuéntá Jesús ndúu estado Judea a ñaha cuni na yehe, nduu. ²³Joo naxini johó na ña cahan java ñayivi sahá i: “Da nacaja xixi xihin yo jihna, da cán cúu da xica nuu cahan tuhun Ndióxi xihin ñayivi viti. Da nacúni jándihi sahá tuhun Ndióxi jihna, da cán cúu da jánaha ñayivi cándéé ini na mé á”, cáchi na. ²⁴Ta viti cája cahnú na Ndióxi sahá ña nandijama mé á yehe.

Na apóstol ndiquehe vaha na Pablo.

2 Tása nayaha uxu comí cuia já nasahan tucu u ñuu Jerusalén. Nasahan Bernabé xihin i ta nasanehe ri i Tito nasahan da xihin nde. ²Ta nasahan i jáchi nanaha Ndióxi nuú i ña ndítahan cuhun i. Ta tá nataca jín ndihi na náhnú, na comí cuéntá sahá na cúu cuéntá Jesús ñuu Jerusalén cán, já nacasáhá i ndícani i nu ná ndaja cáa tuhun vaha saha Jesús ña jánaha i nuú na coó naquixi chichi Israel. Nacaja i ña yóho jáchi coo nacúni ña ná cachi na náhnú cán ña coó saha toho ña jánaha i. ³Ta

nandiquehe vaha na ndehe ta ni coo nacaja ndusa na xihin Tito, da nasahin xihin i na na chican da marca yiqui cuñu da vatí co cúu dá da naquixi chichi Israel. ⁴Joo java na, na co xica ndaa íchi cuéntá Jesús, nandihvi jehé na tañu nde na ná candehe na ndá quiahva núná nuú nde cája cáhnu nde Ndióxi sahá na candeé ini nde Jesús. Jáchí nanducú na cája ndusa na xihin nde na ná ndicó coo nde caja nde tóco ndihi na sáhdá ley Moisés. ⁵Joo coo nacandusa toho nde tuhun cahan na xihin nde jáchí cuni nde cádaa ini ndó na ndaa cahan saha Jesucristo, na cuu jácacu ndaa ínima ndó tá ná candeé ini ndó mé á.

⁶Joo mé na náhnu, na cómí cuéntá sahá na cúu cuéntá Jesús cán coo nacachi na xihin i na ná ndijama i na jánaha i nuú ñayivi. Cáchí i na cúu ná na náhnu vatí co cája toho a nuú i ndá quiahva náhnu chuun ndójo na jáchí in cúu tóco ndihí nu Ndióxi. ⁷Táhán ini na náhnu cán xihin na cája i jáchí nandicuni na na mé Ndióxi quea nasahan chuun yóho nuú i na caca nuu i cahan i tuhun vaha sahá Jesús nuú na coo naquixi chichi Israel. Ta sa mé Ndióxi quea nasahan chuun nu Pedro na ná cahun da cahan da tuhun vaha sahá Jesús nuú na naquixi chichi Israel. ⁸Ta sa mé Ndióxi, mé a nachindahá Pedro cahan da tuhun mé á nuú na naquixi chichi Israel, mé a yóho cúu ri na nachindahá yehe cahan i tuhun mé á nuú na coo naquixi chichi Israel.

⁹Jacobo xihin Pedro xihin Juan cúu ná na náhnu cómí cuéntá sahá na cúu cuéntá Jesús ñuu Jerusalén cán. Ta nandicuni na cán na nacaja Ndióxi cuahá ñamaní xihin i tá nasahan mé á chuun yóho nuú i. Sahá na cán quea natiin na ndahá yehe xihin ndáha Bernabé ta xihin na yóho náha na in cúu nde cája chúun nde xihin tuhun Ndióxi. Na cája na cán quea cája chúun na xihin na naquixi chichi Israel nani ndehe cája chúun nde xihin na coo naquixi chichi Israel. ¹⁰Ta in túhún ñamaní naxica na nuú nde caja nde quea na ná a ndíndójó nde chindeé nde na ndahví. Ta na yóho cúu ndusa na ndíhi ini i cája i.

Pablo jánani da Pedro ñuu Antioquía

¹¹Joo tá nandique táhan i xihin Pedro ñuu Antioquía já nu táhyí da najánani i da jáchí coo nacaja vaha da. ¹²Na nacaja da quea naxixi da xihin na coo naquixi chichi Israel tá cámaní xinu coo java na Israel, na nachindahá Jacobo. Joo tá naxinu coo na Israel cán já nacasáhá tává jiin Pedro mé dá nuú na coo naquixi chichi Israel ta ni co xíxi ga da xihin ná. Jáchí nayihví da ndía cachi na Israel, na jánaha na co ndítahan cuxu na xihin na co cúu na Israel. ¹³Ta xihin na yóho nachijehé Pedro na cáhvi ini da sahá na cán. Ta java na cúu cuéntá Jesús, na naquixi chichi Israel cán nacasáhá cája na tá quiahva cája Pedro. Ta janda Bernabé nacaja da tá

quiahva cája na cán. ¹⁴Anda já naxini i ña co xíca na íchi cuéntá ña ndaa xihín ndinuhu ini na tá quiahva sáhdá tuhun Ndióxi cája na sahá ña cán quéa najánani i Pedro nu táhyí tóco ndihi ñayivi ndúu cán. Já nacachi i já xihín dá: “Yóhó cúun da Israel joo nacasáhá cájún tá quiahva cája na coó naquixi chichi Israel jáchi co cájún ña sáhdá ley Moisés viti. Sahá ña cán quéa co ndítahan nuún caja ndúsa tohún xihín na coó naquixi chichi Israel ña ná caja na ña sáhdá ley Moisés”, nacachi i xihín dá.

Jácaacu Ndióxi ñayivi sahá ña cándéé ini na mé á

¹⁵Janda quiví nacacú cúu yó na Israel ta co cúu yó tátuhun na tóho, na cáchi yo cája cuachi sahá ña co cája na ña sáhdá ley Moisés. ¹⁶Joo sa cándaa vaha iní ña co ndúu ndaa ñayivi nu Ndióxi sahá ña cája na ña sáhdá ley Moisés. Jáchi nduu ndaa na nu Ndióxi sahá ña cándéé ini na Jesucristo cuití va. Ta sa saha mé ña cán nacandéé iní Jesucristo já nanduu ndaa yó nu Ndióxi ta co cúu á sahá ña cája í ña sáhdá ley Moisés jáchi ni in na a cuú nduu ndaa na nu Ndióxi sahá ña cája na ña sáhdá ley Moisés.

¹⁷Cándehé ndo. Sahá ña cúni yo canduu ndaa yo nu Ndióxi sahá ña cándéé iní Jesucristo cuití va sahá ña cán quéa co cája ga í ña sáhdá ley Moisés. Joo cáchi java ñayivi ña ndójo í cuachi sahá ña co cája í ña cáchi mé ley. Vatí co cája í ña cáchi ley Moisés, co cúni cachi ña yóho ña jácahan Jesucristo mí caja í cuachi. Ña yóho co cúu á ña ndaa jáchi co jácahan Jesucristo mí caja í cuachi. ¹⁸Joo mé a ndaa caja í cuachi tá ná casáhá tucu candéé iní ley Moisés ña ná jácaacu a mí jáchi sa najándacoo í ña tá nacandéé iní Jesucristo. ¹⁹Ta viti cúu á tátuhun naxihi yehe cuéntá ley jáchi co cómi ga ley cuéntá sahá i jáchi sahá ña cándéé ini i Jesucristo sahá ña cán jácaacu Ndióxi yehe ña ná catacu u cuéntá mé á. ²⁰Cúu á tátuhun naxihi i ndica crúxu xihín Jesucristo tá naxihi a. Sahá ña cán quéa co cája i tá quiahva cúni mé vi jáchi Jesucristo quéa ndícaan ini i ta mé a cán quéa ndáca yehe. Ta viti tóco ndihi ña cája i ñuyiví yóho cája i ña jáchi cándéé ini i Jesucristo, jahyi Ndióxi, mé á naxihi ndica crúxu sahá i sahá ña quíhvi ini a yehe. ²¹Ta co cúni quehe núu i ñamani cája Ndióxi xihín i jáchi tá ná cuu nduu ndaa yo nu Ndióxi sahá ña cája í ña sáhdá ley Moisés já quéa mé a uun va quéa naxihi Jesucristo, nduu.

Vaha chága candéé iní Jesús a juú ga cándéé ini ña sáhdá ley Moisés

3 Ájana va jini ndó, na ndúu ñundáhyi Galacia. Yo já najándahvi ndohó ña ná jándacoo ndó ña ndaa. Jáchi tá nacahan nde tuhun Ndióxi xihín ndo já nandicani cáxi nde nu ndo ndá quiahva naxihi Jesucristo sahá cuachi. ²Cuni johó ndó ná ndaca tuhún i ndohó: Á nandihvi ínima yii Ndióxi ini ínima ndo sahá ña nacaja ndó ña sáhdá ley

Moisés. Co cúu toho a já. Nasacuu a sahá ña nacandúsa ndó tuhun vaha sahá Jesucristo ña nacahan nde xihin ndo. ³Mé a ndaa táhyí cúu ndó na najana jini. Jáchi tá nacasáhá ndó xica ndó íchi cuéntá Jesús já nasandaca ínima yii Ndióxi ndohó. Ta viti cúni ndó ndicó coo ndó caja ndó ña sáhndá ley Moisés jáchi cáhan ndo ña cuu xinu coo ndó cacuu ndó ñayivi ndaa nu Ndióxi sahá ña cája ndó. Joo a cuú toho a. ⁴Xíní ñúhú ndicuhun ini ndo ndá quiahva nandoho nahá ini ndó sahá tuhun Ndióxi. Á mé a uun va nasacuu ña nandoho ndó jan. Cája i cuéntá uhun. ⁵Jáchi sahan Ndióxi ínima yii mé á nu ndó ta cuahá ndivaha ña náhnu cája mé á tañu ndó ta co cúu á sahá ña cája ndó ña sáhndá ley Moisés. Cúu á sahá ña cándeé ini ndó mé á.

⁶Cáchí tuhun Ndióxi ña nanduu Abraham taa ndaa nu mé á sahá ña nacandeé ini da Ndióxi. ⁷Sahá ña cán quéa ndítahan candaa ini ndó ña ndá na cándeé ini Ndióxi, mé na cán cúu ndusa na tátuhun na naquixi chichi Abraham. ⁸Jáchi sa janda jihna nacachi tuhun Ndióxi ña vaxi quivi casáhá Ndióxi jácacu a ñayivi, na coo naquixi chichi Israel tá ná candeeé ini na mé á. Ña cán quéa nacahan Ndióxi tuhun vaha yóho xihin Abraham já nacachi a já: “Saha mún tandaa tiempo caja cuahá i ñamani xihin ñayivi canduu ndijáá ñuyívi”, cáchí a. ⁹Sahá ña cán quéa tá quiahva nacaja Ndióxi cuahá ñamani xihin Abraham quiahva já cája ri a xihin tóco ndihi ñayivi tá cándeé ini na mé á tá quiahva nacaja Abraham.

¹⁰Joo ndá ñayivi ndúcú nduu ndaa nu Ndióxi sahá ña cája na ña cáchí ley Moisés já quéa cuahan cháhan jata ná. Jáchi cáchí tuhun Ndióxi já: “Cháhan va cuahan jata tóco ndihi na co xinu coo cája tóco ndihi cuí ña cáchí ley ña nacahyí Moisés.” ¹¹Ta cáxí táhyí cáhan ña yóho xihin yo ña a cuú nduu ndaa ñayivi nu Ndióxi sahá ña sácú vaha na ley Moisés. Já cáchí tuhun Ndióxi já: “Ndá na cúu ñayivi ndaa nu Ndióxi catacu na sahá ña cándeé ini na mé á”, cáchí a. ¹²Joo jín va cáchí ley Moisés jáchi cáchí a ña tá cúni na nduu ndaa na nu Ndióxi saha ley Moisés xíní ñúhú caja na tóco ndihi cuí ña cáchí mé ley. Ta co cáhan mé ley sahá ña cándeé ini na Ndióxi.

¹³Joo najácacu Jesucristo mí já ná a xinu coo cháhan jata yo caja ley. Jáchi naquixi cháhan jata mé á saha mí tá naxihí a ndica crúxu. Jáchi cáchí tuhun Ndióxi: “Cháhan cuahan jata ndihi na xihí ndica crúxu.” ¹⁴Ta sahá ña nacaja Jesucristo tá naxihí a ndica crúxu sahá ña cán quéa tóco ndihí vatí cúu yó na Israel á na co cúu na Israel, ñehe táhvi yo ñamani Ndióxi tá cándeé iní mé á. Jáchi já nasahan Ndióxi tuhun a nu Abraham jihna. Ta viti quiahva mé á ínima yii á nu yo tá cándeé iní mé á jáchi já nasahan Ndióxi tuhun a nu yo.

Ña cáchí ley Moisés xihín ña cáchí tūhun nasahan Ndióxi nuú Abraham

¹⁵Ñani mí i, na cúu cuéntá Jesús, candehe ndo ná cahan i xihín ndo ndá quiahva cája ñayivi tá sahan na tūhun na nuú inga ñayivi. Tá cávaha na in tutu ta tá nandihí nacahyi na quiví ná nu á já queá ni in túhún toho ñayivi a cuú ndijama na ña sa nacahyi cán ta a cuú chícāan chāga na tūhun nuú mé tutu. ¹⁶Cāndehé ndo. Nasahan Ndióxi tūhun a nuú Abraham ta nuú in da quixi chichi da. Joo coó nacahan Ndióxi sahá cuahá ñayivi quixi chichi da. Nacahan Ndióxi sahá in tálaá jahyi da ta mé a cán cúu á Jesucristo.

¹⁷Ña cúní cachi i queá: Nasahan Ndióxi tūhun a nuú Abraham ta nasacuu a tátūhun nacahyi Ndióxi quiví á nuú in tutu. Sahá ña cán queá a cuú jándihí ley Moisés sahá tūhun nasahan Ndióxi nuú Abraham. Jáchí jihna núhú nasahan Ndióxi tūhun a nuú Abraham ta tá sa nayaha comí ciento oco uxu cuia já nasahan Ndióxi ley nuú Moisés. Ta mé ley yóho a cuú toho ndijama tūhun nasahan Ndióxi nuú Abraham. Ta mé ley a cuú ndaja núu a tūhun nasahan Ndióxi nu dá jihna. ¹⁸Joo ña sahan Ndióxi nuú ñayivi co quíxi a sahá ña sácú vaha na ley Moisés. Jáchí tá ná quixi a quiahva já co cúu ga sahá ña nasahan Ndióxi tūhun a ña caja mé á ña. Ña nayaha queá nacacúni Ndióxi caja ñamaní uun xihín Abraham ta coó nasacuu a sahá ña nasacu vaha da ley Moisés.

¹⁹Ta viti, á ndáca tūhún ndó ndá saha nasahan Ndióxi ley nuú Moisés. Nasahan Ndióxi ña jáchí cúní a ña ná candaā ini ñayivi ndá quiahva sáá ini na caja na ña cúní Ndióxi. Ta nasacu ini a candoo ley janda quiahva ná xinu coo mé a quixi chichi Abraham cán. Jáchí mé a cán queá nasahan Ndióxi tūhun a quixi. Ta tátō Ndióxi queá nacahan ley yóho xihín Moisés ta najáyaha da ña nuú ñayivi. ²⁰Joo tá nasahan Ndióxi tūhun a nuú Abraham coó naxini núhú toho a ñayivi jáyaha na ña. Ta coó nacaja chúun a tátō mé á jáchí in túhún Ndióxi nacaja mé á ña.

Ña cúní ley caja í

²¹Jihna núhú nasahan Ndióxi tūhun a nuú Abraham anda jáví nasahan ley nuú Moisés. Á cúní cachi ña yóho ña co ndique táhan ley Moisés xihín tūhun nasahan Ndióxi nuú Abraham. Co cúu a já. Jáchí tá ná cuu jácācu ley Moisés ñayivi já queá cuu nduu ndaa na nu Ndióxi sahá ña sácú vaha na ña sáhndá mé ley. Joo co cúu a já. ²²Jáchí cáchí tūhun Ndióxi ña mé cuachi cándíhi a tóco ndihí ñayivi. Joo tá ná candeé iní Jesucristo já cuu ndiquehé ña nasahan Ndióxi tūhun a quiahva nu tóco ndihí ñayivi sahá ña cāndeé ini na mé á.

²³Tá cámaní quixi Jesucristo já nasacomí ley cuéntá saha yo ta nasandaca mí janda quiahva naxinu quiví nanaha Ndióxi nu yo ña

ndítahan candeé iní Jesucristo. ²⁴Nasandaca ley mí tá quiahva cája in dataa xihín jahyi válí da anda quiahva naquixi Jesucristo, mé á nacaja ña ná canduu ndaa yo nu Ndióxi sahá ña candeé iní mé á. ²⁵Ta viti co cómí ga ley cuéntá saha yo jáchi cómí Jesucristo cuéntá saha yo tá cándusa í mé á.

²⁶Ta in nanduu ndó xihín Jesucristo sahá ña candeé ini ndó mé á ta já nanduu ndó jahyi Ndióxi. ²⁷Ta tá nacanduta ndo já in nanduu ndó xihín Jesucristo ta nanduu ndó tá quiahva íin mé á. ²⁸Ta co cája toho a tá cúu ndó na naquixi chichi Israel, á co cúu toho ndó na. Ta co cája toho a á cúu ndó na naxeen ñayivi caja chúun nu ná, á co cúu toho ndó na. Ta co cája toho a á cúu ndó taa á ñaha. Jáchi tá nacandusa ndó Jesucristo já in nanduu tóco ndihi ndó jáchi in nanduu ndó xihín mé á. ²⁹Ta sahá ña cómí Jesucristo cuéntá saha ndo sahá ña cán quea cúu ndó tátuhun na naquixi chichi Abraham. Ta sahá ña cán quea ñehe táhvi ndó ña nacachi Ndióxi quiahva nuú da cán tá nasahan tuhun a nuú Abraham sanahá.

4 Ña cúní cáchí i cúu ña yóho: Cúu á tátuhun tá sahan in dataa tóco ndihi ña cómí da nuú jahyi da. Joo nani cúu dá taa loho já a cuú cacomí da cuéntá sahá ña nandiquehe da ndáha tátá da. Cúu dá tátuhun mozo vatí tandaa quivi cacomí da cuéntá saha tóco ndihi ñaha tátá da. ²Jáchi ndúu java ñayivi, na cómí too cuéntá saha mé dá ta saha tóco ndihi ña najándacoo tátá da nu dá janda quiahva ná xinu coo quivi nasacu ini tátá da. ³Quiahva já yáha ri xihín mé ví. Jáchi jihna nasacuú tátuhun navalí. Nasacomí ley na Israel cuéntá saha yo tátuhun cája xitoho xihín mozo da. ⁴Joo tá naxinu coo quivi nasacu ini Ndióxi já nachindahá mé á Jesucristo, jahyi a. Ta in ñañáha ñuyívi yóho nasacuu ña najácacu ñahá. Ta nacaja mé á ña sáhdá ley Moisés. ⁵Ta naxihi a ndica crúxu já ná cuu chahvi a saha cuachí ña ná jani yó nu ley ña nasacomí cuéntá saha yo. Ta xihín ña yóho nacuu nanduú jahyi Ndióxi.

⁶Ta sahá ña nanduú jahyi mé á sahá ña cán quea nachindahá Ndióxi ínima jahyi a ña ná ndicaan mé á ini ínima yo já quea ná cuu cahan yó xihín Ndióxi já cachi yó já: “Tátá maní i.” ⁷Ta viti co cúu ga yó tátuhun mozo jáchi co cómí ga ley cuéntá saha yo ta nanduú jahyi Ndióxi viti. Ta viti cuu ñehe táhvi yó quehé ña nasacu ini mé á quiahva nuú na cúu cuéntá mé á sahá ña nacaja Jesucristo.

Ndicani ini Pablo sahá na cúu cuéntá Jesús ñundáhyi Galacia

⁸Jihna ga tá coo nacandaa ini ndó saha Ndióxi já nacaja cáhnu ndó java ga ndiόxi ña co cúu toho ndiόxi joo nasacomí a cuéntá saha ndo. ⁹Ta viti sa xini ndó Ndiόxi joo vaha chaga ná cachi i ña sa xini Ndiόxi ndohó. Ta ndivaha cúní ndó ndicó coo tucu ndó caja ndó tá quiahva nacaja ndó jihna.

Jáchí cō ndíyahvi toho ña ñacaja ndó cán ta ni a cuú chindeé a ndohó.

¹⁰Joo cája tucu ndó víco ta xihín ña yóho cája cáhnu ndó java quívi xihín yoo xihín cuia. ¹¹Ndícani ndivaha ini i saha ña cája ndó jan. Jáchí viti cō cánda ini i á mé a uun va nasacuu chuun ñacaja i tañu ndó jan.

¹²Candehé ndó, ñani mí i, na cuú cuéntá Jesús. Xíca tahví i nu ndo ña ná caja ndó tá quiahva cája i viti. Jáchí najándacoo i cája i ña sáhdá ley tá nandihvi i íchí cuéntá Jesús. Vaha ndivaha ñacaja ndó xihín i tá nasahin i xihín ndó jan. ¹³Ta cája i cuéntá ndícuñun ini ndó ña quíhvi ndivaha i tá nu cuítí nasahan i caxi tuhun i tuhun vaha sahá Jesús tañu ndó jan. ¹⁴Ta sahá cuehe nandoho i nacuu candají ndó yehe, nduu. Joo coó ñacaja ndó ña. Ña ñacaja ndó quéa nandiquehe vaha ndó yehe ta ñacaja ndó xihín i tá quiahva ná caja ndó xihín in táto Ndióxi á xihín Jesucristo. ¹⁵Ta ñacajii ndivaha ini ndó mé tiempo cán. Jáchí xini vaha i ña nasahin tiahva ndó tavá ndó nduchú núu ndo quiahva ndó ña nuú i, nduu tá ná cuu caja ña ná ndivaha i. ¹⁶Joo viti nanduu u tátuhun in da ihvi ndo sahá ña cáhan i ña ndaa sahá Jesucristo xihín ndo.

¹⁷Ndúu java ñayivi tañu ndó jan ta cō jánaha na ña ndaa nu ndo. Cája cuaha ná ñamani xihín ndo joo a juú ña vaha quéa cúni na xihín ndo. Na cúni na quéa ná jácaxoo táhan í ta ná ndíhi ini ndó saha ña jánaha mé ná. ¹⁸Cō cúni cachi i ña a váha toho ndíhi iní sahá ñayivi. Vaha va ná caja í ña níí tiempo ta xihín ndinuhu iní. Joo ñayivi jan ndíhi ini na saha ndó tá íin yehe tañu ndó cuítí va. ¹⁹Candehé ndó, jahyi a. Nacasáhá ndíhíhvi tucu ini i saha ndo. Tá quiahva ndíhíhvi in ñáñáha tá sáhdá a tixi ná cácu jahyi ña quiahva já ndíhíhvi ini i saha ndo. Ta ndoho tá ndoho chága ini i saha ndo janda quiahva ná caja ndó ña cúni Jesucristo. ²⁰Viti ñúhú cúu ini i coo i jan já ná cuu cahan vaha chága i xihín ndo jáchi janda nu íin i yóho ndícani ndivaha ini i saha ndo.

Ña ñacaja Agar xihín ña ñacaja Sara sanahá

²¹Candehé ndo. Mé ndó, na cúni ndiquiahva tucu ndáha ley Moisés, xini ñúhú candehé vaha ndó ña cáchí mé ley cán. ²²Cáchí a ña ñacacu ivi jahyi taa Abraham. In jahyi da ñacacu xihín Agar, ña cuú mozo ñájíhí da ta inga jahyi da ñacacu xihín Sara, ña cuú ñájíhí vaha da. ²³Tá ñacacu jahyi taa Abraham xihín Agar cán, ñacacu a tá quiahva cácu tóco ndíhi ñayivi. Joo jahyi taa da, da ñacacu xihín ñájíhí vaha da, ña naní Sara cán ñacacu a jáchi nasahan Ndióxi tuhun a nu dá ña ná cacu a. ²⁴Candehé ndo ña náha ña yóho nu yó. Ndívi najíhí yóho cúu ná tátuhun ivi tuhun nasahan Ndióxi nu yó. In táhan tuhun yóho cúu á ley nasahan Ndióxi nuú Moisés jini yúcu naní Sinaí cán. Ta Agar cúu yuhú nuú ley yóho. Ta jahyi ña cán tá ñacacu a nanduu a mozo. Ta na ndíco ley cúu ná tátuhun jahyi Agar jáchi cómi ley

cuéntá saha ná. ²⁵Ta Agar cúú ñá yuhú nuu ley ña nasahan Ndióxi nuú Moisés yúcu naní Sinaí, ña ndacaan chí ñundáhyi Arabia cán. Ta jári mé ña cúú ñá yuhú nuu Jerusalén, ña cúú jini nu tóco ndihi na cája ña sáhdá ley Moisés. Ta mé ña xihín na ndúu cán cúú ná tátuhun mozo jáchi cómi ley cuéntá saha ná. ²⁶Joo íin inga nuu Jerusalén, ña íin indivi cán. Ta ñayivi ndúu cán co cúú toho na mozo jáchi cúú ná tátuhun jahyi Sara, ñájíhi vaha Abraham. Ta mí cúú yó tátuhun na ndúu nuu cán jáchi cándéé ini Jesucristo. ²⁷Já cáchi tuhun Ndióxi já:

Xíní ñúhú cajii ini ndó najihí, na a cuú cacu jahyi.

Cayuhú ndó xihín ña cájii íni ndó,

vatí a ñáha cahnda tixi ndó cacu jahyi ndó.

Jáchi najihí, na najándacoo too yí canduu chága jahyi na a juú ga najihí ndúu yí, cáchi tuhun Ndióxi.

²⁸Candehé ndó, ñani i, na cúú cuéntá Jesús. Cúú yó tátuhun Isaac, jahyi Sara cán sahá ña cándéé ini Jesús jáchi cúú yó jahyi nasahan Ndióxi tuhun a quiahva nuú Abraham. ²⁹Joo tá quiahva nacaja da cúú jahyi Agar sanahá tá nacasahá da cája xixi da xihín da cúú jahyi Sara quiahva já íin a viti jáchi na sácú vaha ley Moisés cája xixi na xihín na cándéé ini Jesucristo.

³⁰Joo cuni johó ndó ña cáchi tuhun Ndióxi tá nacaan Ndióxi xihín Abraham: “Tavá ña cúú mozo jan ná quee ña cuhun ña xihín jahyi ña. Jáchi da cúú jahyi mozo jan a cúu ñehe táhvi dá ndiquehe da ña quiahva i nuú da cúú jahyi ñájíhi vahún jan”, nacachi Ndióxi sanahá. ³¹Candehé ndó, ñani i, na cúú cuéntá Jesús. Co cúú yó tátuhun jahyi ña cúú mozo jan jáchi co cómi ga ley cuéntá saha yo. Viti cúú yó tátuhun jahyi Sara, ña cúú ñájíhi vaha Abraham cán jáchi co ndúu ga yó ndáha ley Moisés sahá ña cándéé ini Jesucristo.

Sa najani yo ndáha ley Moisés nacaja Jesucristo

5 Co ndúu ga yó ndáha ley Moisés sahá ña nacaja Jesucristo. Ta viti cándéé ini ndó mé á sahá ña cán quea xíní ñúhú canduu ndacú ndó ta co ndítahan nu ndó ndicó coo ndó caja ndó ña sáhdá mé ley cán.

²Cuni johó ndó ña cahan i xihín ndó. Tá ná cándéé ini ndó ña cuu nduu ndaa ndó nu Ndióxi sahá ña chícāan na marca yiquí cuñu ndó já quea cúní cachi a ña quehe núu ndó ña nacaja Jesucristo tá naxihí a ndica crúxu saha ndó. ³Candehé ndó ná cahan tucu u xihín ndó. Tá cúní ndó canduu ndaa ndó nu Ndióxi sahá ña chícāan ndó marca yiquí cuñu ndó já quea ndítahan nu ndó caja ndó tóco ndihi cuíí ña sáhdá ley Moisés. ⁴Mé ndó cúú ndó na cúní canduu ndaa nu Ndióxi sahá ña sácú vaha ndó ley Moisés. Ta viti nacaxoo ndó nu Jesucristo ta nacaxoo ndó nuú ñamaní cúní Ndióxi caja xihín ndó. ⁵Joo mé nde xíní vaha nde ndúu ndaa nde nu Ndióxi sahá ña

cándeé ini nde Jesucristo. Ta ndáti tiãhva nde jáchi chíndeé ínima yíi Ndióxi ndẽhe. ⁶Jáchi tá in nanduú xihín Jesucristo já quéa coó caja toho a á naquihvi marca yiquí cuñu í á coó a. Ña ndíyahvi ndusa quéa ña cándeé iní Jesucristo jáchi xihín ña yóho cuu quihvi iní ñani táhan í.

⁷Sa vaha ndivaha va cuahan ndó xihín ña cándeé ini ndó Jesús. Yo já nandijama jini ndo ña ná a cándusa ga ndó ña ndaa. ⁸A juú toho Ndióxi nandijama jini ndo jáchi mé a cán quéa nacana ndohó ña ná cacuu ndó cuéntá mé á. ⁹Xíní ñúhú ndicuhun ini ndó in tuhun ta já cáchí a “Vatí loho yusá naxaa ná cava táhan í xihín yusá cuaha cán jativí ñahá a.” Quiahva já cája na cúni ndijama jini ndó jan. ¹⁰Joo cándeé ini i Jesucristo, xitoho í sahá ña cán quéa xini vaha i ña a cándusa ndó na jan ta ndicó coo ndó cahvi ini ndó tá quiahva cáhvi ini yehe. Ta jándoho Ndióxi ini na xíca jájaca xíní túní ndó jan ta coó caja toho a ndá na cúu ná.

¹¹Joo yehe jánaha i nuú na cúu cuéntá Jesús ña co ndítahan ga chícāan na marca yiquí cuñu na ta sahá ña cán quéa ndícuīta na Israel xihín i. Tá ná jánaha i nuú ñayivi ña ndítahan chícāan na marca yiquí cuñu na já quéa a ndícuīta ga na cán xihín i. Joo mé a ndaa cándají na cán yehe jáchi jánaha i nuú ñayivi ña cuu cacu ndaa ínima ná sahá ña cándeé ini na Jesucristo cuití va, mé a naxihí ndica crúxu saha yo. ¹²Sahá ña cúni na cán caja ndúsa na xihín ndó chícāan ndó marca yiquí cuñu ndó sahá ña cán quéa cája i cuéntá vaha chága ná chitúhun ndihi mé ná yiquí cuñu na ta ná jándacoo táji ná ndohó.

¹³Candehé ndó, ñani i. Co ndúu ga ndó ndáha ley Moisés nacaja Jesucristo. Joo co cúni cachi ña yóho ña najani ndo já ná cuu caja ndó ndá ña núu ña xíca ini yiquí cuñu ndó caja. Jáchi nacana Ndióxi ndohó ña ná quihvi ini táhan ndó ta ná chindeé táhan ndó. ¹⁴Joo tóco ndihi ña cúu ley Moisés in cáchí ndihi a tá cáchí a já: “Quihvi inún ñani táhún tá quiahva quihvi inún mún.” ¹⁵Joo cuéntá coo ndó jáchi tá casáhá ndo cája xíxi xihín táhan ndó ta cája quini xihín táhan ndó já quéa xinu quiví jándihi saha táhan ndó.

Ña cúni ínima yíi Ndióxi caja í xihín ña cúni yiquí cuñu í caja í

¹⁶Candehé ndo, ñani i. Ndítahan caja ndó ña cúni ínima yíi Ndióxi ta co ndítahan caja ndó ña xíca ini yiquí cuñu ndó caja. ¹⁷Jáchi tóco ndihi ña núu ña cúni yiquí cuñu yó caja í cáni táhan xihín ña vaha ña cúni ínima yíi Ndióxi caja í. Ta a cuú cuni táhan ínima yíi Ndióxi xihín ña núu jáchi co ndíque táhan vaha ña núu xihín ña vaha sahá ña cán quéa a cuú caja í ndá ña nacuu cúni yó caja í. ¹⁸Ta tá ná ndiquiahva ndó mé ndó ña ná candaca ínima yíi Ndióxi ndohó já quéa a cácomí ga ley Moisés cuéntá saha ndo.

¹⁹Ta cō yáncá toho ndícuní ndá nā cúú nā cája ña núu ña cúní mé ná caja na. Jáchí ña cája na cúú ña yóho: ndúu na xihín nā cō cúú ñájíhí nā á yíí ná ta cája na tá nuú ña núu xihín yiquí cuñu na. Ta ndícají ini na cuju na xihín ñáha á taa. ²⁰Cája cáhnu na yocō xihín tiniñu yúú ta cája na ña tají. Ta cándají táhan na. Ta cáni táhan na ta ndácaan ña cuíñú jini ná. Ta cama chá jáa xihín táhan na. Ta cáhvi ini na saha mé cuití va na. Ta cátóó nā jácani táhan na ñayivi já ná canduu jín na. Ta xihín ña yóho sáhndá táhan na ñayivi. ²¹Cúú ná ñayivi ihvi ini ta cúú ná nā sáhní ndii ta cúú ná nā xíhi. Ta a juú quiahva ndehé nā ta cuahá ndivaha java ga táhan ña yóho cája na. Joo mé ndó cuni johō ndó ná cahan tucu u ña sa nacachi i jihna xihín ndo: Ndá nā cája já a ñéhe táhvi toho na cacomí Ndióxi cuéntá saha ná.

²²Joo tá ndícaan ínima yíi Ndióxi iní já quéa cája mé á ña ná quihvi ini táhan í ta cája ña ná cajii iní ta cája ña ná coo vaha iní ta cája ña ná a cójo cama iní ta cája ña ná chindeé yó ñayivi ta cája ña ná cacuú ñayivi vaha ini ta cája ínima yíi Ndióxi yóho ña ná cacuú ñayivi, nā cō cáhvi ivi johō ini. ²³Ta cája ña ná cacuú ñayivi, nā cō ndíñehe jícó mé, nā cúú sáhnú mé. Ta ni in túhún toho ley a cuú chícaan cuachi jatá ñayivi tá sácú vaha na tóco ndihi ña cáchí tuhun yóho. ²⁴Tóco ndihi nā cómí Jesucristo cuéntá saha, sa najándacoo na ña núu nasacahvi ini na caja na xihín yiquí cuñu na. Ta cúú ná tátuhun nā sa naxihí nuú cuachi nasacaja na. ²⁵Cō cája ga yó cuachi nacaja í jihna sahá ña ndácaan ínima yíi Ndióxi iní. Ta xíní ñúhú quiahva í ñamaní nu mé á ña ná candaca a mí nuú ndihi ña caja í.

²⁶Ta cō ndítahan ndíñehe jícó yō mí ta ni cō ndítahan jácani táhan í ñayivi ta ni cō ndítahan cahihvi ini xihín táhan í.

Ndítahan nuú nā cúú cuéntá Jesús chindeé táhan na

6 Candehé ndó, ñani i. Tá naxini ndó nandicava in nā cúú cuéntá Jesús nuú cuachi já quéa ndítahan nu ndóhó, nā nachutú ndaa ínima xihín ínima yíi Ndióxi, chindeé ndó nā já ná ndicaca vaha na íchí cuéntá Jesús. Joo vií vií cahan ndó xihín ná jáchí ndítahan cahvi ini ndó ña vaxi quiví tá cuu ndicava ri ndóhó va nuú cuachi. ²Xíní ñúhú chindeé táhan ndó tá ndóho ini ndó. Ta xihín ña yóho jáxinu cōo ndó ña sáhndá Jesucristo nu ndó caja ndó.

³Tá ndúu java na tañu ndó ta cáhán nā cúú ná nā náhnú ndivaha vatí cō cúú á ña ndaa já quéa jándahvi na mé va na. ⁴Tá in tá in ndó ndítahan candehé ndo ndá quiahva cája ndó já ná cuu cajii ini ndó tá cája vaha ndó. Ta cō ndítahan ndíñehe jícó ndo mé ndó sahá ña cáhán ndo ña vaha chága cája mé ndó a juú ga inga ga nā. ⁵Jáchí tá in tá in ndó ndítahan nu ndó candehé ndó ña cája ndó, á cúú á ña vaha á cúú á ña núu.

⁶Tóco ndihi ndó, na jácuaha tũhun Ndióxi ndítahan nu ndó chindeé ndó na jánaḥa ndohó xihín ña cómi ndo.

⁷Jándahvi ndó mé ndó tá cáhán ndo ña cuu jándahvi ndó Ndióxi jáchi a cuú jándahvi ñayivi Ndióxi. Sa xini ndó tá xutu ndó in tata nu ñúhu já queá vaxi quiví tá jáquee ndó mé ñaha naxutu ndó. ⁸Tá cája ñayivi ña núu ña cúní mé cuití na já queá vaxi quiví cūhun na indayá sahá ña núu nacaja na. Joo tá cája na ña vaha ña cájii ini ínima yii Ndióxi xihín já queá ñeḥe táhvi na cūhun na coo na xihín Ndióxi anda ama cáa quiví, caja ínima yii Ndióxi. ⁹Sahá ña cán queá a cánaá yó cája í ña vaha jáchi tá ná a jándacoo í cája í ña cúní Ndióxi já queá vaxi quiví quiahva Ndióxi nu yó ña ndítahan ndiquehé sahá ña táhan ini mé á xihín ña nacaja í. ¹⁰Sahá ña cán queá tá núná nu yó caja vaha í xihín tóco ndihi ñayivi cóho caja í ña. Ta cachí ga ví tá cuú ná na cándeé ini Jesús.

Ndíndayí Pablo na cuú cuéntá Jesús

¹¹Candehé ndó ndaja náhnú letra cáhyí i nu ndo xihín ndáha mí i viti. ¹²Cúní ña ná candaa ini ndó sahá java ga ñayivi, na cúní caja ndúsa xihín ndo ña ná chícāan ndó marca yiquí cuñu ndó. Cája na ña yóho jáchi cúní na candoo vaha na nuú na Israel. Ta yíhvi na ndicuíta ñayivi xihín ná sahá ña cándúsa na Jesucristo, mé a naxihí ndica crúxu sahá cuachí. ¹³Joo mé na chícāan marca yiquí cuñu cán co sácú vaha na tóco ndihi ña sáhdá ley Moisés. Joo cúní na ña ná chícāan ndó marca yiquí cuñu ndó já ná cuu caḥan lándā na nuú na Israel sahá ña nacaja ndúsa ná xihín ndo. ¹⁴Joo yeḥe, ni in túhún toho ñaha co cúní caḥan lándā i saha. Ña cúní caja i queá caḥan i sahá Jesucristo, mé á naxihí ndica crúxu. Ta sahá ña cándeé ini i Jesucristo sahá ña cán queá cuú á tátũhun naxihí i nuú ña núu ñuyíví yóho. Co cúní ga i cája i ña cája ñayivi ñuyíví ta co cúní na cán catáhan na xihín i. ¹⁵Ta co ndíyahvi nu Ndióxi á naquihvi marca yiquí cuñu í á coó a. Ña ndíyahvi ndusa queá ña nanduu ñayivi saá sahá ña cándeé iní Jesucristo. ¹⁶Cúní ña ná coo vaha ini ndó, na cája ña caḥan i yóho. Ta ná caja Ndióxi cuahá ñamaní xihín ndó ta xihín tóco ndihi na cuú cuéntá mé á.

¹⁷Ta viti xihín chínuu co cúní ga i ña ná jáquihvi ga ñayivi yeḥe. Jáchi tóco ndihi yanda ndáá a nu yiquí cuñu i náha ña mé a ndaa cuú u da cája chúun cuéntá Jesucristo.

¹⁸Ñani i na cuú cuéntá Jesús, ña cúní queá ná caja Jesucristo, xitoho í cuahá ñamaní xihín ndihi ndó. Já ná coo.